

現代生活藝術系列

華嚴經疏論纂要 53

——十迴向品之七

華藏淨宗學會印贈

大方廣佛華嚴經疏論纂要卷第五十三

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

十廻向品第二十五之七

○三十七支節諸骨

佛子菩薩摩訶薩布施乞者支節諸骨如法藏菩薩
光明王菩薩及餘無量諸大菩薩施其身分支節骨
時見乞者來生愛樂心歡喜心淨信心安樂心勇猛
心慈心無礙心清淨心隨所乞求皆施與心

〔疏〕前云骨髓髓已前明而加支節諸骨若合者但
是一事謂支節之骨若開支節自是一事如節節
支解等卽前列所無

菩薩摩訶薩施身骨時以諸善根如是迴向所謂願
一切衆生得如化身不復更受骨肉血身願一切衆
生得金剛身不可破壞無能勝者願一切衆生得一
切智圓滿法身於無縛無著無繫界生

〔疏〕迴向行中言無繫界者卽涅槃界

願一切衆生得智力身諸根圓滿不斷不壞願一切
衆生得法力身智力自在到於彼岸願一切衆生得

堅固身其身貞實常無散壞願一切衆生得隨應身
教化調伏一切衆生願一切衆生得智熏身具那羅
延支節大力

〔疏〕言具那羅延支節大力者如涅槃枝量鈔言具那羅延

者即涅槃繫北經第十一南本第十現病品因佛現
臥迦葉恠問如來已離病惱何故倚臥便枝量佛
力云十小牛力不如一大牛力十大牛力不如一
青牛力十青牛力不如一凡象力十凡象力不如一
一野象力次四牙象次雪山白象次香山象次青
象次黃象次赤象次白象次鉢健提次入臂那羅延次
芬陁利象次一力士次鉢健提次八臂那羅延次
十住菩薩一節之力皆前前之十不及後後之一
如前六重故知
佛力不可思議

願一切衆生得堅固相續不斷絕身永離一切疲極

勞倦願一切衆生得大力安住身悉能具足精進大
力願一切衆生得徧世間平等法身住於無量最上
智處願一切衆生得福德力身見者蒙益遠離衆惡
願一切衆生得無依處身皆得具足無依著智願一
切衆生得佛攝受身常爲一切諸佛加護願一切衆
生得普饒益諸衆生身悉能徧入一切諸道願一切
衆生得普現身普能照現一切佛法

疏言普照現身者如淨明鏡無不現故餘可知

願一切衆生得具足精進身專念勤修大乘智行願
一切衆生得離我慢貢高清淨身智常安住無所動

亂願一切衆生得堅固行身成就大乘一切智業願
一切衆生得佛家身永離世間一切生死是爲菩薩
摩訶薩施身骨時善根迴向爲令衆生得一切智永
清淨故

疏所爲中言得智者智爲萬德之骨故

○三十八施身皮

佛子菩薩摩訶薩見有人來手執利刀乞其身皮心
生歡喜諸根悅豫譬如有人惠以重恩逢迎引納敷
座令坐曲躬恭敬而作是念此來乞者甚爲難遇斯
欲滿我一切智願故來求索饒益於我歡喜和顏而

語之言我今此身一切皆捨所須皮者隨意取用猶如往昔清淨藏菩薩金脇鹿王菩薩及餘無量諸大菩薩等無有異

〔疏〕引例中清淨藏菩薩未見同名智論十六中如毒龍受一日戒被剝五色皮忍而施之云云言金脇鹿王者智論及菩薩本緣集經第三說金脇鹿救於溺者彼人背恩告王取鹿大例名同而非施皮鈔智論者論云問曰已知尸羅相云何波羅密答曰有人言菩薩持戒寧自失身不毀小戒是為尸羅波羅密如上蘇陀摩王經中所說不惜身命以全禁戒如菩薩本身會作大力毒龍若衆生在前身力弱者眼視便死身力強者氣往而死是龍曾受一日禁戒出家求靜入林樹間思惟坐久

疲懈而睡龍法睡時復形如蛇身有文綵七寶雜色獵者見之驚喜言曰此乃希有難得之皮獻上國王以爲服飾不亦宜乎便以杖按其頭以刀剝其皮龍自念言我力如意傾覆此國其如反掌此語於是自忍眠目不視閉氣不息憐愍此人爲持戒故一心受剝不生悔意旣以失皮赤肉在地時日大熱蜿轉土中欲趣大水見諸小蟲來食其身爲持戒故不復敢動自思惟言我今此身以施諸蟲爲佛道故今以肉施以充其身後成佛時當以法施以益其心如是誓已身乾命終卽生第二劫利天上爾時毒龍卽今我身釋迦佛是是時獵者提婆達多等六師是諸小蟲輩釋迦佛初轉法輪八萬諸天得道者是菩薩護戒不惜身命決定不悔其事如是名尸羅波羅密釋曰雖本明戒正是施皮耳菩薩本緣經亦有此緣其事更廣先爲大龍有大勢力或化身爲人與諸龍女共相娛樂至毘陁山幽邃之處金翅欲食欲來諸山碎壞泉池令其枯涸諸龍龍女化爲女人來附此龍龍爲金翅說慈心法令反本宮後爲諸龍說慈心法亦令

行慈後捨誼就靜山間齋戒多日困乏暫臥止息
遂遇惡人餘同上智論及菩薩本緣經者經云菩
薩過去墮畜生中而爲鹿身兩脇金色脊似瑠璃
餘處雜廁種種難名髀如碑礫角如金精其身莊
嚴如七寶藏身色光焰如日初出諸天敬重爲立
名字名金色鹿善解人言爲諸羣鹿宣說正法爲
大利益下取意畧引至一河邊瀑水泛溢損壞樹
岸見一溺人投水救之其人得濟白鹿王言君卽
是我再生父母何以報德鹿王言我無所須以身
皮妙常恐人見當嘿汝言知恩之人具多功德不
知恩者多受苦報此人背恩還白王知王卽命駕
令此溺人引至鹿所鹿王正睡有鳥啄耳覺已瞻
望見王兵已近乃安撫羣鹿云王爲我來汝勿驚
怖尋至王所溺者指言此是鹿王兩手墜落王見
是事下馬詣鹿鹿却慰王令勿驚怖我施一切衆
生無畏王遂讚言汝雖獸身非實畜也王語鹿言
旣施一切衆生無畏爲何令此溺人兩手墮落鹿
王答言如人犯官重法自招其咎此人自作自受
非我使然王便長跪又手白鹿我從今日長相歸
依鹿白王言若能爾者願賜此人無畏如赤子想

此人必墮地獄故可憐愍王益稱敬願長為弟子
普施諸鹿令得無畏勅令國內不得遊獵殺害衆
生廣如彼說更有九色鹿經事緣一同但云九色
又王夫人夜夢託病王為求之許分半國貪利見
王言知鹿處當即面癩後結會云鹿即我身是王
即父王夫人即先施利烏即阿難溺人即調達餘
皆同也釋曰金色義同
非正捨皮云大例相似

菩薩爾時以諸善根如是迴向所謂願一切衆生得
微細皮猶如如來色相清淨見者無厭願一切衆生
得不壞皮猶如金剛無能壞者願一切衆生得金色
皮如閻浮檀上妙真金清淨明潔願一切衆生得無
量色皮隨其心樂現清淨色願一切衆生得淨妙色
皮具足沙門善軟清淨如來色相願一切衆生得第

一色皮自性清淨色相無比願一切衆生成就如來
清淨色皮以諸相好而自莊嚴願一切衆生得妙色
皮放大光明普照一切願一切衆生得明網皮如世
高幢放不可說圓滿光明願一切衆生得潤澤色皮
一切色相悉皆清淨是爲菩薩摩訶薩施身皮時善
根迴向爲令衆生皆得一切嚴淨佛刹具足如來大
功德故

〔疏〕願中云相好皮者謂金色等

鈔相好者相謂三十二相中第十五

身皮金色好者八十種好中第十六世尊身皮潤滑柔軟光悅鮮淨塵垢不著故疏云等所爲

云淨佛刹者皮爲外相故

○三十九施手足指

佛子菩薩摩訶薩以手足指施諸乞者如堅精進菩薩閻浮提自在王菩薩及餘無量諸大菩薩菩薩爾時顏貌和悅其心安善無有顛倒乘於大乘不求美欲不尚名聞但發菩薩廣大之意遠離慳嫉一切諸垢專向如來無上妙法佛子菩薩摩訶薩如是施時攝諸善根悉以迴向願一切衆生得纖長指與佛無異願一切衆生得臍圓指上下相稱願一切衆生得赤銅甲指其甲隆起清淨鑿徹願一切衆生得一切智勝丈夫指悉能攝持一切諸法願一切衆生得隨

好指具足十力願一切衆生得大人指纖臍齊等願
 一切衆生得輪相指指節圓滿文相右旋願一切衆
 生得如蓮華卍字旋指十力業報相好莊嚴願一切
 衆生得光藏指放大光明照不可說諸佛世界願一
 切衆生得善安布指善巧分布網縵其足是爲菩薩
 摩訶薩布施指時善根迴向爲令衆生一切皆得心
 清淨故

〔疏〕迴向十願纖長者量

〔鈔〕纖長者直就事說若約相好纖長是相卽三十二

中第臍圓者形

臍圓是第二好

赤銅者色

赤銅是第一好

能攝者

力此以智爲指

能攝者持法界故亦第五十三好

隨好者妙言十

力者隨一一指能持一切世界等

隨好者總指由此一句故別名

二云為力為色等亦喻伽二十指皆殊妙為二十隨好也

齊等者不參差

齊等者不

參差即第三隨好二云各等無差

輪相等者梵本云願一切衆生得

十指端裏面皆有千輻輪相所餘節中裏面皆有

本那伽吒及以塞縛悉底迦相相間莊嚴準此則

圓滿之言應云滿餅右旋之言應云有樂若準觀

佛三昧海經一一指節端有十二輪相現八中準

梵本願得大蓮華難提迦物多相指却是右旋十

力業報者亦十種大那羅延幢勇健法也相即纖

等好即殊妙有二云萬字旋者約中文也準三昧海

經指端各有萬字相萬字點間有千輻輪相網縵者經云歛指不現張時卽現如真珠網分明可愛餘可知所爲云得清淨心者得指由心故

○四十施連肉爪

佛子菩薩摩訶薩請求法時若有人言汝能施我連肉爪甲當與汝法菩薩答言但與我法連肉爪甲隨意取用如求法自在王菩薩無盡菩薩及餘無量諸大菩薩爲求法故欲以正法開示演說饒益衆生一切皆令得滿足故捨連肉爪甲與諸乞者菩薩爾時以此善根如是迴向所謂願一切衆生皆得諸佛赤

銅相爪願一切衆生得潤澤爪隨好莊嚴願一切衆
生得光淨爪鑿徹第一願一切衆生得一切智爪具
大人相願一切衆生得無比爪於諸世間無所染著
願一切衆生得妙莊嚴爪光明普照一切世間願一
切衆生得不壞爪清淨無缺願一切衆生得入一切
佛法方便相爪廣大智慧皆悉清淨願一切衆生得
善生爪菩薩業果無不淨妙願一切衆生得一切智
大導師爪放無量色妙光明藏是爲菩薩摩訶薩爲
求法故施連肉爪甲時善根迴向爲令衆生具足諸
佛一切智爪無礙力故

〔疏〕言赤銅相者卽是小相五無比者事爪則不染塵垢智爪則不染境相言善生者善業生故有二西域方言謂善生爲端正餘可知所以求法偏語施爪者一則以引例中有現事故下入火求法亦準此通二有所表以爪能觸取順求義故下入火求者表難取故故智論云般若波羅密猶如大火聚四邊不可取無取亦不取故

○四十一求法入火

佛子菩薩摩訶薩求佛法藏恭敬尊重生難得想有能說者來語之言若能投身七仞火坑當施汝法菩

薩聞已歡喜踊躍作是思惟我爲法故尚應久住阿
鼻獄等一切惡趣受無量苦何況纔入人間火坑卽
得聞法竒哉正法甚爲易得不受地獄無量楚毒但
入火坑卽便得聞但爲我說我入火坑如求善法王
菩薩金剛思惟菩薩爲求法故入火坑中

〔疏〕施行中言七仞者一仞七尺也

鈔求法入火者
三地有文又賢

愚經云又復世尊過去久遠無量阿僧祇劫此間
浮提有大國王名曰梵天王有太子字曇摩鉗好
樂正法四方求法周徧不獲愁悶懊惱帝釋化爲
婆羅門來詣王所王請就座爲說妙法婆羅門言
學之甚難云何便說太子審問答言若能作大火
坑令深十丈滿中熾火自投於中爲供養者吾乃
與法太子如教羣臣諫喻令愍我等婆羅門言吾
不相逼若不爾者吾不說法王知意定令使乘八

千里象宣告一切太子却後七日求法入火諸小王等遠近皆集悲哀勸喻太子告言我於久遠生灰之中喪身無數人中爲貪更相殘害天上壽盡失欲憂苦地獄之中火燒湯煮等受無量苦未曾爲法吾今以此臭穢之身爲法供養云何止我將欲投火先請說法時婆羅門爲說偈云常行於慈心除去恚害想大悲愍衆生矜傷爲雨淚修行大喜心同已所得法救護以道意乃應菩薩行聞說法已便投火坑帝釋梵王各執一手而歎之言一切生類賴太子安何爲投火喪他父母太子答言爲無上道不惜身命纔投於火火變花池太子安然坐蓮華臺諸天雨花沒至於膝爾時梵天王者淨梵王是

菩薩爾時以此善根如是迴向所謂願一切衆生住佛所住一切智法永不退轉無上菩提願一切衆生離諸險難受佛安樂願一切衆生得無畏心離諸恐

怖願一切衆生常樂求法具足喜樂衆法莊嚴願一
切衆生離諸惡趣滅除一切三毒熾火願一切衆生
常得安樂具足如來勝妙樂事願一切衆生得菩薩
心永離一切貪恚癡火願一切衆生悉得菩薩諸三
昧樂普見諸佛心大歡喜願一切衆生善說正法於
法究竟常無忘失願一切衆生具足菩薩神通妙樂
究竟安住一切種智是爲菩薩摩訶薩爲求正法投
火坑時善根迴向爲令衆生離障礙業皆得具足智
慧火故

〔疏〕迴向行中初及第九約求法爲願餘約入火爲

願

○四十二爲求法護法

佛子菩薩摩訶薩爲求正法分別演說開菩薩道示
菩提路趣無上智勤修十力廣示一切智心獲無礙
智法令衆生清淨住菩薩境界勤修大智護佛菩提
時以身具受無量苦惱如求善法菩薩勇猛王菩薩
及餘無量諸大菩薩爲求法故受無量苦乃至攝取
誹謗正法惡業所覆魔業所持極大惡人彼所應受
一切苦惱以求法故悉皆爲受

〔疏〕受衆苦者如香城粉骨雪嶺忘軀其類非一

如鈔

香城粉骨等下句卽涅槃上句卽大般若般若文
廣今依大品二十七畧引經云佛告須菩提菩薩
摩訶薩求般若者當如薩陁波崙此云常啼欲求
般若若不惜身命聞空中聲汝但東行莫憚勞苦卽
當得聞菩薩聞已作是念言令我東行何時何處
當聞般若卽任立啼泣經于七日空中有佛卽語
之言從此東行五百由旬有城名衆香彼有菩薩
名曇無竭此云法尚日中三時宣說般若波羅密
心念欲往卽得無量三時法門諸佛慰喻忽然不
現欲見法尚自念貧無何以供養遂欲賣身中路
有城以魔蔽故竝無人聞賣身之聲唯有城中長
者女聞帝釋化爲婆羅門云我不要人唯要人血
髓用祀天神菩薩遂刺左臂出血割右髀肉復當
破骨出髓時長者女樓上遙見下問其故答云我
欲供養法尚求聞般若若女遂止之許供所須與共
同往帝釋卽時復天身云我相試耳欲求何願答
云與我無上菩提帝釋言是佛境界非我所能更
何所求答云無所求帝釋乞令其身如故菩薩許
之平復如故釋曰此卽粉骨言香城者彼衆香城
七重欲往彼故又至彼城刺血灑地故言雪嶺亡

軀者卽涅槃第十四聖行品明世尊昔在雪山修行爲求菩提帝釋化爲羅刹去其不遠遂說半偈云諸行無常是生滅法菩薩忽聞豎髮舉視遂見羅刹初疑其人若聞此偈不合受此可畏之身又思或於過去佛所曾聞尋往問言汝於何處得是過去離怖畏者所說半偈半如意珠耶羅刹言曰我饑調言菩薩請言汝所說者義味不盡爲我說終我當終身爲汝弟子供給所須又言我今饑苦終不能說菩薩問言汝須何食羅刹答言我所飲者唯人熱血我所食者唯人暖肉我飛行處處而不能得菩薩請言但爲我說我聞偈已以身奉施羅刹又言誰當信汝菩薩答言釋提桓因大梵天王得他心者諸佛菩薩以爲證明次脫衣服以敷高座羅刹坐已說餘半偈云生滅滅已寂滅爲樂羅刹又言偈已說竟當施我身菩薩是時深思此義若石若壁若樹若道書寫此偈後升樹上投身而下未至於地虛空之中發種種聲稱歎菩薩上至阿迦膩吒天釋復本身接之安置平地稱讚善哉真是菩薩必成正覺願見濟度禮足而去因此乃超彌勒菩薩十二劫在先成佛言其類非一者

如菩薩本緣經說虔闍那梨王凌樂正法廣召賢
達有婆羅門應詔而至令王剗身千燈經停七日
廣集眷屬遂剗千燈燈如錢大添滿油竟請說偈
法婆羅門說偈言常者皆盡高者亦墮合會有離
生必有灰聞竟然燈又發願言願成菩提然大法
燈照於一切帝釋問云得無悔耶答言不悔若不
虛者平復如故言畢平復賢愚經第一亦有此緣
名虔闍婆梨又有釵身千道涅槃二十二亦有賣
身重法之緣恐繁不引八十經中普賢自說
求法因緣第三地中亦說求法內外無恡

以此善根如是迴向所謂願一切衆生永離一切苦
惱逼迫成就安樂自在神通願一切衆生永離諸苦
得一切樂願一切衆生永滅苦蘊得照現身恒受安
樂願一切衆生超出苦獄成就智行願一切衆生見
安隱道離諸惡趣願一切衆生得法喜樂永斷衆苦

願一切衆生永拔衆苦互相慈愛無損害心願一切
衆生得諸佛樂離生死苦願一切衆生成就清淨無
比安樂一切苦惱無能損害願一切衆生得一切勝
樂究竟具足佛無礙樂是爲菩薩摩訶薩爲求法故
受衆苦時善根迴向爲欲救護一切衆生令離險難
住一切智無所障礙解脫處故

○四十三求法捨海內所南卽捨王位所統也

佛子菩薩摩訶薩處於王位求正法時乃至但爲一
文一字一句一義生難得想能悉罄捨海內所有若
近若遠國土城邑人民庫藏園池屋宅樹林華果乃

至一切珍竒妙物宮殿樓閣妻子眷屬及以王位悉能捨之於不堅中求堅固法爲欲利益一切衆生勤求諸佛無礙解脫究竟清淨一切智道如大勢德菩薩勝德王菩薩及餘無量諸大菩薩勤求正法乃至極少爲於一字五體投地正念三世一切佛法愛樂修習永不貪著名聞利養捨諸世間自在王位求佛自在法王之位於世間樂心無所著以出世法長養其心永離世間一切戲論住於諸佛無戲論法

疏可知

菩薩爾時以諸善根如是迴向所謂願一切衆生常

樂惠施一切悉捨願一切衆生能捨所有心無中悔
願一切衆生常求正法不惜身命資生之具願一切
衆生悉得法利能斷一切衆生疑惑願一切衆生得
善法欲心常喜樂諸佛正法願一切衆生爲求佛法
能捨身命及以王位大心修習無上菩提願一切衆
生尊重正法常深愛樂不惜身命願一切衆生護持
諸佛甚難得法常勤修習願一切衆生皆得諸佛菩
提光明成菩提行不由他悟願一切衆生常能觀察
一切佛法拔除疑箭心得安隱是爲菩薩摩訶薩爲
求正法捨國城時善根廻向爲令衆生知見圓滿常

得住於安隱道故

〔疏〕迴向行中言疑箭者如涅槃說人中毒箭應速拔之若妄分別未究而終故

○四十四爲王斷殺等

佛子菩薩摩訶薩作大國王於法自在普行教命令除殺業閻浮提內城邑聚落一切屠殺皆令禁斷無足二足四足多足種種生類普施無畏無欺奪心廣修一切菩薩諸行仁慈葢物不行侵惱發妙寶心安隱衆生於諸佛所立深智樂常自安住三種淨戒亦令衆生如是安住菩薩摩訶薩今諸衆生住於五戒

永斷殺業

〔疏〕施行中自住三聚淨戒令他住於五戒是爲法
施五戒殺初故此偏語若望所殺是無畏施

以此善根如是迴向所謂願一切衆生發菩提心具
足智慧永保壽命無有終盡願一切衆生住無量劫
供一切佛恭敬勤修更增壽命願一切衆生具足修
行離老死法一切災毒不害其命願一切衆生具足
成就無病惱身壽命自在能隨意住願一切衆生得
無盡命窮未來劫住菩薩行教化調伏一切衆生願
一切衆生爲壽命門十力善根於中增長願一切衆

生善根具足得無盡命成滿大願願一切衆生悉見
諸佛供養承事住無盡壽修習善根願一切衆生於
如來處善學所學得聖法喜無盡壽命願一切衆生
得不老不病常任命根勇猛精進入佛智慧是爲菩
薩摩訶薩住三聚淨戒永斷殺業善根迴向爲令衆
生得佛十力圓滿智故

○四十五救於形殘

佛子菩薩摩訶薩見有衆生心懷殘忍損諸人畜所
有男形令身缺減受諸楚毒見是事已起大慈悲而
哀救之令闍浮提一切人民皆捨此業菩薩爾時語

其人言汝何所爲作是惡業我有庫藏百千萬億一切樂具悉皆充滿隨汝所須盡當相給汝之所作衆罪由生我今勸汝莫作是事汝所作業不如道理設有所獲於何可用損他益已終無是處如此惡行諸不善法一切如來所不稱歎作是語已卽以所有一切樂具盡皆施與復以善語爲說妙法令其歡悅所謂示寂靜法令其信受滅除不善修行淨業互起慈心不相損害彼人聞已永捨罪惡

疏初施行中具足三施於中三初覩境興悲次菩薩爾時下以法諫喻後作是語下財法雙救財救

所害之現苦法救能害之當苦示寂靜滅修淨業

道滅集因故俱舍論說昔有黃門救五百牛毀形

之事善根力故男形具足

鈔俱舍論說等者與西域記第一金同彼云是

屈支國舊曰龜茲國城西門外路之左右各立佛像高九十餘尺五年修設一大會西北渡河至阿奢里貳伽藍唐言奇特相傳云昔此國先王崇敬三寶將欲遊方觀禮聖跡乃命母弟攝知留事其弟受命竊自割勢防未萌也封之金函持以上王王曰斯何謂也對曰駕迴之日乃可開發即付執事隨軍掌護王之還也果有構禍者白王王命監國姪亂中宮王聞震怒欲置嚴刑弟曰不敢逃責願開金函王遂發而觀之乃斷勢也曰斯何異物欲何發明對曰王昔遊方命知留事懼有讒禍割勢自明今果有徵願垂照鑒王深敬異情愛彌隆出入後庭無所禁礙王弟於後行遇一夫擁一百牛欲視刑腐見而懷念引類增懷我今形虧豈非宿業即以財寶贖此羣牛以慈善力男形漸具以

形具故遂不入宮王怪而問之乃陳其始末王以爲奇特遂建伽藍式旌美迹傳芳後葉從此立名菩薩爾時以此善根如是迴向所謂願一切衆生具丈夫形成就如來馬陰藏相願一切衆生具男子形發勇猛心修諸梵行願一切衆生具勇猛力恒爲主導住無礙智永不退轉願一切衆生皆得具足大丈夫身永離欲心無有染著願一切衆生悉得成就善男子法智慧增長諸佛所歎願一切衆生普得具於大人之力常能修習十力善根願一切衆生永不失壞男子之形常修福智未曾有法願一切衆生於五欲中無著無縛心得解脫厭離三有住菩薩行願一

切衆生成就第一智慧丈夫一切宗信伏從其化願
一切衆生具足菩薩丈夫智慧不久當成無上大雄
疏二廻向行中修諸梵行未必制心後離欲心必
無身過具男子形但異女身具大丈夫必心懷道
德

是爲菩薩摩訶薩禁絕一切毀敗男形善根廻向爲
令衆生具丈夫形皆能守護諸善丈夫生賢聖家智
慧具足常勤修習丈夫勝行有丈夫用巧能顯示七
丈夫道具足諸佛善丈夫種丈夫正教丈夫勇猛丈
夫精進丈夫智慧丈夫清淨普令衆生究竟皆得

〔疏〕四所爲中初令得果後常勤下令得起行丈夫
 行者涅槃十八云一切男女若具四法卽名丈夫
 一近善知識二聽聞正法三思惟其義四如說修
 行又四相品具四相故名爲丈夫鈔四如說修行者此下餘經云
 善男子若男若女具足四法謂名丈夫若夫若男子
 無此四法卽不得名爲丈夫也何以故身雖丈夫
 行同畜生如來調伏若男若女是故佛號調御丈
 夫也又四相品卽南經北經卽如來性品卷當第
 四言四相者一者自正二者正他三者能隨問答
 四者善解因緣義前亦已引意云自正者明信三
 寶常住不移寧以利刀割斷其舌終不說言如來
 法僧是無常也二正他者意云隨機授法智小未
 堪說無常等智大堪化乃可具說常無常等三能
 隨問答者意云善知如來制聽之意隨問而說如
 有問言云何不施一錢得大施名佛言不食酒肉
 施以酒肉不飾香花施以香花無費一毫施名流

布迦葉因言食肉之人不應受施便為廣說斷肉之制昔開三種乃為漸損其貪耳四善解因緣義者意云知佛有何因緣初不說深不廣制戒後方說之知未堪聞故先未說未有過失故不廣制隨過補之然此四相將為衆生開大涅槃為能開德通是利他若別說者初一自利自行非邪故名為正後三利他令離邪過故名正他此一正是利他行體後二化德能隨問答明知法藥自在隨問巧答四達根性善知隨機授化因緣上就能開以說若就所開四者經云復次自正者所謂得是犬般涅槃正他者我為比丘說言如來常存不變隨問答者迦葉因汝問故得廣為菩薩摩訶薩比丘比丘尼優婆塞優婆夷說是甚深微妙義理因緣義者聲聞緣覺不解如是甚深之義不聞伊字三點而成解脫涅槃摩訶般若成秘密藏我今於此闡揚分別為諸聲聞開發慧眼等餘廣如彼經此中但取知其四又云雖是女人能信自身有佛性者事名丈夫耳

即是丈夫故男子不信即是女人顯示七丈夫道

卽丈夫用道字梵本名爲揭底此云事業晉本云
丈夫趣與道相近然七丈夫總有多說一約世間
瑜伽丈夫有其七義一長壽久住二妙色端嚴三
無病少惱四非僕非女非半擇迦五智慧猛利六
發言威肅七有大宗葉具此七法名爲丈夫道卽
是彼之因也卽下所列六句小有開合可以思準
前令具丈夫形卽非女等也二依小乘有七丈夫
卽七賢聖一隨信行二隨法行三信解四見至五
身證六慧解脫七俱解脫離世間品當說此應不
願成彼小乘三依大乘瑜伽七地卽七賢聖如十

住品初說四依瓔絡六位及信卽上生賢聖家復
有說言卽七善知謂知法知義知時知足知自知
衆知尊卑故佛丈夫種所謂大悲成十力等爲佛
丈夫丈夫正教卽內三藏及外五明餘文易了雖
女人下亦卽涅槃第九經末前廣說女人之過竟
便云善男子以是義故諸善男子善女人等聽是
大乘般涅槃經常應訶責女人之相求於男子何
以故是大乘經典有丈夫相所謂佛性若人不知
是佛性者我說是等名爲女人若能自知有佛性
者我說是人爲丈夫相若有女人能知自身定有
佛性當知是卽是男子釋曰此文證宗五
性者都非丈夫若具四德不揀男女卽丈夫矣

大方廣佛華嚴經疏論纂要卷第五十三

建安縣建寧里龍頭菴比丘寂禪捐衣
孟之貲刊刻
華嚴經十廻向品疏論纂要第五十三
卷永遠流通上薦
故考魏應禎妣管氏鳳娘永脫娑婆頓
超淨土遊毘盧之性海入華藏之玄門
情與無情同圓種智
康熙己未年十二月
華藏室謹題